



Selasa, 09 Agustus 2022
Ogen: Josua 15:1-12



Taneh Adat



Masyarakat adat e me singgelem keberagaman budaya i doni enda. Tanggal 9 Agustus, iperingeti 'hari masyarakat adat se dunia' si tujunna gelah masyarakat adat banci mpertahanken ras njagai tradisi, sistem pemeteah si unik ras erbage warisen budayana. Sabap alu la iarap perkembangan jaman rikut ras belinna keperluan manusia ditingen belinna pengaruh budaya 'populer' erbahan kebijakan, kebayakan tradisi tergusur. Bahasa adat ntah pe suku nterem lanai metehsa. Subuk taneh enggo kerina erlumba ndayaisa, termasuk pe taneh kuta, ntah taneh adat. I bas paksa gundari enda lit turah kerna piga-piga persoalen taneh adat, siigelari taneh ulayat. Tradisi taneh, tep-tep adat lit aturenna jine si masyarakat adat e ngenca ngangkaisa, rikutken aturenna nai nari enggo lit rikutken budaya-budaya.

Kenca Israel bengket ku taneh siipadanken Dibata, kerina suku-suku ndatken tanehna. I je me ia ras kesusurena nggeluh bagi singena ate Dibata. E maka tradisi Israel, taneh e la banci idayaken, amin sempat pe terdaya ntah terutang, iulihkan man si mada i bas paksa tahun Yobel, tahun pembebasen. Bage belinna erti taneh pusaka, taneh suku-suku, taneh adat si enggo iaturken nai-nai nari. I bas renungenta enda, ituriken suku Juda ndatken taneh rikutken batas siaturken i bas daerah-daerah si lit. I je me suku Juda ringan rikutken pembagin siibahan man bana.

I bas masyakatta pe khususna kalak Karo, lit nge taneh kuta rikutken panteken kuta e, merga siapai simanteki kuta. Amin lanai bo kerina ngangkaisa tapi arah renungeta enda ngasjuk kita mediate nandangi tradisi ntah pe budayata e. Gelah anak kempta pe ku lebe enda, iantusina si e janah ngasup ia ngergai budaya si enggo iukuri nini bulangta nai.